

Gid pou ban zanfan

EDISION
2016



**Violans sexiel
kouma to kapav
protez twa ?**



Anviron enn zanfan lor 5 viktim agresion sexiel, dan tou pei, dan tou klas sosial. Okenn zanfan pa an sirte. Dan plis ki 90 % bann ka, bann zanfan, tifi ek garson, agrese par kikenn ki pros ar zot. Zom ou fam. Pli souvan, li enn zom.

REZIME



- P 4** Ki ete enn violans sexiel?
- P 5** Kifer li grav ek li interdi ?
- P 6** Ki sann-la ena drwa trov twa touni ek tous to lekor ?
- P 7** Enn kalin, enn bizou, enn agresion sa ?
- P 7** Enn zanfan ki finn agrese, eski li koupab ?
- P 8** Ki sann-la fer sa bann agresion-la ?
- P 9** Ki ete enn pedofil ?
- P 10** Kouma to kapav fer atansion?
- P 11** Kifer to bizin mefie Internet?
- P 12** Ki bizin fer si to enn viktim ou si to konn kikenn ki enn viktim ?
- P 13** Ar ki sann-la to bizin koze?
- P 14** Ki to kapav fer si personn pa pe ekout twa ?



1. Ki ete enn violans sexiel?

Se kan enn adilt, enn zanfan mem laz ou pli gran ki twa :

- demann twa montre li to parti intim
- tous ou kares to bann parti intim
- demann twa gete, touse ou kares so bann parti intim.
- demann twa get bann zimaz ou bann video kot ena sex.

Bann parti intim, ki ete sa ?

Sex (penis, vazin, tounn, toutounn, zizi, kok, zezet...), fes (poum, tonkin, popotin, deryer...), pwatrinn (tete, doudou), labous.



2. Kifer li grav ek li interdi ?



Li ilegal. Lalwa pini bann dimounn ki komet enn akt sexiel lor enn zanfan. Ki li dan so koze ou dan so bann aksion. Bann akt sexiel interdi avek enn zanfan. Lalwa pini sa bann dimounn-la.

Enn zanfan ki finn sibir bann violans sexiel, mem enn sel fwa, kapav soufer tout long so lavi. Sa bann aksion-la ou sitiasion kapav met twa mal alez, degout twa, fer twa per ou onte. Mem si sa pa degout twa, mem si to finn kontan, li interdi parski to enn zanfan.

3. Ki sann-la ena drwa trouv twa touni ek tous to lekor ?

To lekor, pou twa sa.

Lezot bizin respekte to lekor. To ena drwa refiz ki lezot trouv twa touni ou ki enn adilt tous twa, mem si li fer parti to fami e ki to bien kontan li.

Li pa enn agresion sexièl kan :

- Enn dokter tous to lekor pou konsilte twa ek gete si to bien. Me li bizin fer sa dan so kabine oubien dan lopital e an prezans enn to paran.
- Enn mama ki pe donn doudou so ti-baba.
- Bann paran ki pe sanz kous zot ti-baba ou pe bengn li. Me apartir 2 an, enn zanfan bizin kapav koumans savonn li tousel. Ek souy li kan li al twalet.



4. Enn kalin, enn bizou, enn agresion sa ?

Ena bann sign lafeksion ki normal.

Si to papa ou to mama anbras twa ou ser twa dan zot lebra, se enn sign tandres, pa enn agresion.

Bann atousman ou anbras twa lor to sex, to pwatrinn, to labous ou to tonkin interdi. Kan to pou vinn adolesan ou adilt to pou kapav swazir ki sann-la kapav tous to lekor.

5. Enn zanfan ki finn agrese, eski li koupab ?

Non, enn zanfan ki finn agrese, li enn viktim !

Tou bann zanfan dan lemond bizin proteze kont bann violans sexiel. Zot ilegal. Souvan si to finn agrese, to gagn per, to gagn onte ek to santi twa koupab.

Pa to fot si kikenn finn agres twa, mem si ena dimounn ki dir lekotr.



6. Ki sann-la fer sa bann agresion-la ?

Agreser-la, li pli gran, enn adolesan oubien enn adilt ; zom ou fam. Li souvan enn dimounn ki zanfan-la kone ek kontan : kikenn dan so fami, enn vwazin, enn animater, enn profeser... Parfwa li menase ek li move.

Li ousi kapav zanti ek sey fer twa krwar ki seki li finn fer normal, ki li kontan twa ek ki sa se enn sekre ant zot. Manti sa ! Sa bann akt-la pa normal ditou. Pa bizin gard sa enn sekre mem si demann twa.



7. Ki ete enn pedofil ?

Se enn adilt ki anvè fer bann akt sexiel avèk enn zanfan. Serten pedofil fini par fer li, e agres bann zanfan. Zot servi zanfan pou zot prop plezir. Ler zot pe fer sa, zot pe komet enn akt kriminel.

Enn dimounn ki finn komet enn akt sexiel avèk enn zanfan li enn pedokriminel. Lalwa pini sa. Bann pedokriminel konsian ki zot pe fer kiksoz ki pa bon, ki grav ek ilegal. Zot touzour kasiet pou komet sa bann akt-la.



8. Kouma to kapav fer atansyon?

To lekor, pou twa sa.

To kapav refiz ki kikenn tous twa :

- mem si se enn dimounn ki to bien kone ek ki to kontan
- mem si sa finn deza arive
- mem si li bien difisil anpes dimounn-la fer sa.

Si li pa ekout twa e pa respekte ki to finn dir NON, al koz sa ar enn adilt ki to fer konfians, ki pou ekout twa, ki pou krwar twa ek protez twa.

Mefie twa bann move sekre ek dir zot.

Bann bon sekre fer twa ere, parey kouma fer enn sirpriz kikenn pou so laniverser. Bann move sekre met twa mal alez ek fer twa gagn per. Pa ezite koz enn sekre ek enn adilt ki to fer konfians.



9. Kifer to bizin mefie Internet?

Parski bann pedofil azir lor Internet osi. Zot kasiet zot vre lidantite pou piez bann zanfan. Si enn dimounn ki to pa kone poz twa bann kestion ki zenn twa, prevenir enn adilt ki to fer konfians. Seki korek se ki kan to al lor Internet ena enn adilt avek twa. Sirtou si to ena mwins ki 13 an.

Mem si dimounn-la paret serye, mem si zot vinn kamarad, li kapav fer twa ditor. Saki zame to bizin bliye se zame donn linfoasion personel a ninport ki sann-la lor Internet. Atansion ! Pa met bann foto kot to touni ou an mayo de bin lor Internet.



10. Ki bizin fer si to enn viktim ou si to konn kikenn ki enn viktim ?

To bizin koz sa ar enn adilt ki to fer konfians. Mem si agreser-la enn dimounn pros ar twa, kikenn ki to kontan boukou. Mem si li dir twa ki se enn sekre ant zot ek ki bizin pa dir.

- Kan to rakont seki finn arive, pou kapav ed twa ek protez twa.
- To pou ou si kapav ed zanfan ki to kone enn viktim.
- To pou ou si anpes sa dimounn-la fer mem zafer ar lezot zanfan.

Pa bliye : to ni responsab, ni koupab si to viktim enn agresion sexiel.

11. Ar ki sänn-la to bizin koze?

To kapav koz
avek enn adilt ki to fer
konfians :

enn dimounn dan to fami, enn
profeser, to metdekol, enn psiko-
log, enn counsellor, enn dokter
dan lekol, paran enn kamarad.
Li inportan ki sa dimounn-la
krwar twa ek protez twa.

To kapav
apel 113, lazourne
ek lanwit.

Pou ena touzour kikenn
ki pou reponn twa, ki pou
ekout twa ek
konsej twa.

To kapav al
dan enn stasion
lapolis.

Bann lapolis la pou ekout
twa, rant to plint ek fer
enn lanket.



12. Ki to kapav fer si personn pa pe ekout twa ?

Si adilt avek ki to finn koze pa pe ekout twa ek pa pe ed twa, al koz ek enn lot dimounn. Si to pa oze dir, to kapav ekrire. Rapel twa ki fer bann zafer sexiel avek enn zanfan, li interditi ek lalwa pini sa. Li pa fasil koz sa me seki to finn sibir li bien grav ek li inportan ki protez twa, ed twa ek ki personn pa rekoumanse.

KONT VIOLANS SEXIEL LOR BANN ZANFAN :

azir pou ki zot aret sibir sa

Nou finn anvi azir pou fer fas a kantite ka violans kont bann zanfan ek lanplè violans sexiel. La Sentinelle finn lans enn kanpagn avek Pédostop, Dialekt ek LEAD. Sa kanpagn-la finn gagn soutien Minister Gender, Devlopman Zanfan e Bien-et Lafami. Enn plan aksion finn etabli ek enn kanpagn kominikasyon nasional finn koumanse an Zien 2015 pou fer bann adilt konn bann sign ki kapav indike ki bann zanfan viktim agresyon sexiel.

Dernie faz sa kanpagn-la se sa ti-gid ki destine a bann paran avek enn parti pou zanfan. Nou espere ki li pou kontribiye pou enn pli gran konsians fleo violans sexiel lor bann zanfan. Nou espere ou si ki li pou permet aret sa silans otour bann agresyon sexiel lor zanfan ek permet signal sa kalite violans la a bann striktir proteksyon zanfan.

Dimounn ki finn fer sa travay-la :

- Acquilina Fabrice, zournalis e redakter an sef l'express Junior, La Sentinelle
- Harelle Audrey, responsab kontrol kalite, La Sentinelle
- Vigier de Latour-Bérenger Mélanie, psykososyolog e port-parol ONG Pedostop

Koordinasyon :

- Fidèle Nathasia, asistan kominikasyon, La Sentinelle
- Dulaurent Shirley, responsab kominikasyon

Nou remersie :

- Bastien Daniella, tradiktris
- Nombreuse David, pou miz an paz, Business Publications Ltd.
- POV, ilustrater, La Sentinelle
- Etienne Marie-Michèle, pou la vwa
- Shirley Dulaurent, La Sentinelle

Ek pou reлектir :

- Duval Emilie, dokter an psikoloji klinik
- Clifford Colimalay, direkter edisyon, La Sentinelle
- Lim Kong Teresa, psikolog klinisyenn
- Nisse Martine, ediktris spesyalize ek fer terapi familial, co-fondatris ek direktris Centre des Buttes Chaumont dan Paris

Enn inisativ

Avek soutien :

